

1★ وزیر دفاع راجناتھ سنگھ نے جموں میڈیکل کالج ہسپتال غو دورو لاغے چشوتی کشتواڑ مانہ بدل پھٹن غا حالہ واقع مانہ زخمی ہوا افراد سنگ ملاقات کی ہے ۔ وہ خراب موسم غی وجہ نال چشوتی غو دورو نہیں کر سکیا۔

2★ لیفٹنٹ گو رنر منوج سنہا نے جی ایم سی جموں غو دورو لاغے چشوتی کشتواڑ مانہ بدل پھٹن غا واقع مانہ زخمی ہوا افراد غی اعادت کی ہے ۔

3★ وزیر اعلیٰ عمر عبداللہ نے تمام محکماں نانہ ہدایت کی ہے جے وہ جموں کشمیر مانہ جا ری پہاری بارشاں غے پیش نظر انتہائی چوکسی غو مظاہرو کریں۔

4★ اینڈین انسٹیٹیوٹ آف اینٹیگریٹو میڈیسن مانہ سیلابی پانی آجان غے بعد انسٹیٹیوٹ غی بنیا دی منزل تیں طالب علماں نانہ محفوظ طور ور باہر کڈھ لیو گیو ہے ۔

5★ تھائی لینڈ مانہ " ایشین ہاڈی بلڈنگ اینڈ فزیک سپورٹس چمپئنشپ سال 2025 غے دوران جموں کشمیر غا دو کھلاڑیاں نے میڈل حاصل کیا ہیں۔

Rajnath Singh Visit

وزیر دفاع راجناتھ سنگھ آج دوپہر بعد جموں پُچ گیا ہیں۔ جموں آمد غے فوراً بعد وہ گو رنمنٹ میڈیکل کالج ہسپتال جموں پُچیا ، جت اُنہاں نے حال ہی مانہ ضلع کشتواڑ غا چشوتی گراں مانہ بدل پھٹن غا واقع مانہ زخمی ہوا افراد غی اعادت کی۔ زخمیاں سنگ ملاقات غے دوران وزیر دفاع غو کہنو تھو جے وہ چشوتی غا مقام ور جان غا خواہشمند تھا ، ور خراب موسم غی وجہ نال نہیں جا سکتا۔ ہسپتال مانہ پہرتی کیا گیا تمام زخمی افراد غو مناسب علاج معالجو جا ری ہے ، تے اُن غی حالت ہُن بہتر دسی جا رہی ہے ۔ اس موقع ور وزیر دفاع نے کہیو۔ بائٹ۔ واضح رہے جے چشوتی غا مقام ور قدرتی آفت غی زد مانہ آغے کئی افراد ہلاک جد کہ کئی دوجا لا پتہ ہو گیا ہیں۔ وزیر دفاع ہُن واپس دہلی روانہ ہو گیا ہیں۔

LG GMC Visit

لیفٹنٹ گو رنر منوج سنہا نے آج جی ایم سی جموں غو دورو لاغے چشوتی کشتواڑ مانہ بدل پھٹن غا واقع مانہ زخمی ہوا افراد سنگ ملاقات کی ہے ۔ میڈیا غا نمائنداں سنگ گل کرتاں واں اُنہاں نے دسیو جے ہسپتال مانہ 16 زخمی افراد غو علاج جا ری ہے تے اِن تمام زخمیاں غی حالت ہُن بہتر ہو گئی ہے ۔ اُنہاں نے دسیو جے رلیف تے باز آبا دکا ری غو کم جا ری ہے تے سرکار تمام متاثرہ خانداناں غی مدد واسطے ہر ممکن کوشش کر رہی ہے ۔ اُنہاں نے دسیو ہے جے آجوں وی 32 افراد لا پتہ ہیں ۔ لیفٹنٹ گو رنر نے یقین دوايو ہے

جے متاثرہ افراد نانہہ بر ممکن مدد مہیا کرائی جائے گی۔ جس مانہہ طبی امداد، مالی مدد تے باز آبا د کا ری غو کم شامل ہیں۔ میڈیا غا نمائنداں سنگ گل کرتاں واں لیفٹنٹ گو رنر نے کہیو۔ بائٹ۔

CM Alert

وزیر اعلیٰ عمر عبداللہ نے تمام محکماں نانہہ ہدایت کی ہے جے وے جموں کشمیر غا بکھ بکھ رہا ئشی علاقہ مانہہ پہاری بارش غی وجہ نال پانی آجان تے دریاواں تے نالاں مانہہ خطرہ غا نشان تیں اُپر پانی غا بہاؤ غے پیش نظر زیا دہ توں زیا دہ چوکسی برتیں۔ کنٹرول رومز متحرک ہیں تے وزیر اعلیٰ غا دفتر نانہہ تمام محکماں سنگ رابطہ مانہہ رکھیو گیو ہے۔ متاثرہ علاقہ تیں پانی غا نکاس تے پین غا پانی اور بجلی جیسی ضروری سہولتاں غی دستیابی نانہہ ترجیح دتی جائے گی۔ لوکاں نانہہ خبردار رہن غی صلاح دتی گئی ہے۔ تے رلیف اور بچاؤ کا ری ٹیماں نانہہ کسے وی ہنگامی صورتحال سنگ نمڑن غی خاطر چوکسی ور رکھیو گیو ہے۔

Cycling Marathon

صحت تے جسمانی تندرستی نالے لوکاں نانہہ مشغول رکھن نانہہ فروغ دین غا ارادہ سنگ جموں کشمیر پولیس نے آج ریا سی مانہہ فٹ انڈیا مو منٹ غے تحت اک سائیکل دوڑ غو اہتمام کیو۔ اس دوڑ نانہہ بہیم گڑھ قلعہ تیں جھنڈی دس غے روانہ کیو گیو۔ جس مانہہ نوجواناں، طالب علماں، پولیس غا جواناں تے سائیکلنگ غا شوقین افراد نے بدھ چڑھ غے حصو لیو۔ یاہ ریلی سیلا گراں مانہہ پُج غے اختتام پذیر ہو گئی۔ اس ریلی سنگ لوکاں مانہہ صحت مند طرز زندگی آپنان تے چست دو ست رہن غو پیغام دتو گیو ہے۔ اس موقع ور بولتاں واں آئی آر پی فرسٹ ہٹالین غا ڈی ایس پی سنجے آبرول غو کہنو تھو جے جسمانی طور ور چست رہنو نہ چھڑو جسمانی مضبوطی واسطے ضروری ہے بلکہ دماغی لچک تے نظم و ضبط واسطے وی بڑو اہم ہے۔ اُن غو کہنو تھو۔ بائٹ۔

PTC Announcement

آکاشوانی جموں غا علاقائی خبراں غا شعبہ غی طرفوں ضلع جموں واسطے پی ٹی سی غی خاطر درخواست طلب کی گئی ہیں۔ اس سلسلہ مانہہ مقرر کیا گیا پر فارما ور خواہشمند اُمید واراں تیں درخواست طلب کی گئیں ہیں۔ آکاشوانی جموں واسطے پی ٹی سی غی درخواست دین آلا اُمید وار غی عمر 24 تیں 50 بہراں بشکارہو نی چاہیے، اس سلسلہ مانہہ کہٹو سکھٹ لازمی تعلیم صحافت مانہہ پی جی ڈپلومو یاہ ڈگری یا فر کسے تسلیم شدہ یونیورسٹی تیں گریجویشن غی ڈگری غے نال نال صحافت مانہہ 2 بہراں غو تجربہ ہونو ضروری ہے۔ اس غے نال نال اُمید وار کمپیوٹر غی جانکاری وی رکھتو وے۔ اُمید وار ضلع صدر مقام یاہ میونسپل حدود تیں 10 کلو میٹر غا دائرہ مانہہ رہا ئش رکھتو ہونو چاہیے۔ تے اُمید وار ضلع جموں غو بسنیک ہونو چاہیے۔ اس ضمن مانہہ درخواست غی ہارڈ کا پی تمام ضروری کاغذات غے ہمراہ آکاشوانی جموں غا علاقائی

خبریں غا شعبہ غا سربراہ غا دفتر مانہہ دستی طور ور 31 اگست 2025 بروز اتوار شام 6 بجے تک پُج جانی چاہیں۔ اس سلسلہ مانہہ تفصیلی جانکا ری حاصل کرن واسطے متعلقہ ویب سائٹ غو استعمال کیو جا سکے۔ پتو اس طرح ہے

www.newsonair.gov.in

مزید خبریں نال عبدالمجید ور اُس تیں پہلاں یوہ پیغام۔ (یہ خبر تم آکاشوانی جموں تیں سُن رہیا ہیں، تے یہ خبر مہاری ویب سائٹ نیوز آن آئیر ڈاٹ گوو ڈاٹ ان ور وی دستیاب (ہیں، اس تیں یہ خبر مہاری مو بائل ایپ تے ڈی ٹی ایچ ور وی دستیاب ہیں)

IIM- Flood Waters

حُکام نے دسیو ہے جے آئی آئی ایم یعنی انڈین انسٹی ٹیوٹ آف انٹی گریٹو میڈیسن غا کہٹ و کہٹ 45 طالب علماں نانہہ بو سٹل کمپلیکس غی بنیا دی منزل سیلاب غا پانی مانہہ دُبن غے بعد ایس ڈی آر ایف تے پولیس غی مشترکہ کا روائی مانہہ محفوظ جگہیں منتقل کر دتو گیو ہے۔ اج سویر نہر مانہہ 7 فٹ تیں زیا دہ پانی آجان غی وجہ نال نہر غو پانی اُچھل غے ادارہ غی ہوسٹل غی عمارت مانہہ داخل ہو گیو تھو۔ ایس ڈی آر ایف تے پولیس نے طالب علماں تک پُجن واسطے کشتیاں سمیت افراد نانہہ تعینات کیو۔ حُکام نے مزید دسیو ہے جے بچاؤ کا روائی 5 گھنٹاں تیں وی زیا دہ دیر تک جا ری رہیں تے اس عمارت مانہہ پھنسیا تمام طالب علماں نانہہ محفوظ باہر کڈیو گیو ہے۔ آئی آئی ایم غا ڈائریکٹر ڈاکٹر زبیر احمد نے دسیو ہے جے طالب علماں غا محفوظ قیام غا انتظامات کر لیا گیا ہیں۔ اُنہاں نے کہیو۔۔ بائٹ۔۔

Heavy Rainfall

آج سرگی لگاتار بارشاں غی وجہ نال جموں خطہ غا کئی علاقاں مانہہ سیلابی صورتحال غو سامنو ہے۔ جس غی وجہ نال کئی سڑکاں تے کہر کوٹھاں نانہہ نقصان پُجن غے نال نال رہا نشی علاقاں مانہہ پانی جمع ہو جان تے ٹریفک مانہہ رُکاوٹ غی اطلاعات ملی ہیں۔ اس توں علاوہ جموں پٹھانکوٹ قومی شاہراہ ور ساہر کھڈ ور بنیا پُل نانہہ لگاتار بارشاں غی وجہ نال آیا سیلاب سنگ نقصان پُجیو ہے۔ اُوں محکمہ موسمیات نے آئندہ 24 گھنٹاں غے دوران کٹھوعی، ڈوڈہ، کشتواڑ، پونچھ تے راجو ری ضلعان مانہہ پہاری تیں مچ پہاری بارشاں غی پیشنگوئی کرتاں واں چوکسی غو اعلان کیو ہے۔ اس عرصہ مانہہ جموں ڈویژن مانہہ بدل پھٹن، اچانک سیلاب آجان تے زمینی توداں غا کھسکن بارے خبردار کیو گیو ہے۔ یاہ ایڈوائزری آئندہ 25 اگست توڑی واسطے جاری کی گئی ہے۔

خراب موسم غے پیش نظر پہلکیں یعنی 25 اگست نانہہ دسویں تے گیا رویں جماعت غا جھیڑا امتحان ہونا تھا وے جموں کشمیر بو رڈ برائے اسکولی تعلیم نے جموں کشمیر تے لداخ یوٹی پھر مانہہ موخر کر دتا ہیں۔ ملتوی امتحانات غی نویں تا ریکھاں غو اعلان کنی کیو جائے گو۔

Samba Rains

ضلع سانہہ مانہہ پہاری بارشاں غی وجہ نال بسنتر دریا مانہہ سیلاب جیسی صورتحال بن گئی ہے۔ اس دوران با رشاں غی نال لا س پسی پین نال سانہہ مانسر اُدھم پور سڑک کئی جگہاں ور بند ہو گئی ہے تے انتظامیہ نے سڑک نانہہ صاف کرن واسطے عملو تے مشین لا دتی ہیں۔ ضلع غا دار وئین، سرنا، منانو تے دوجا علاقہاں غا کئی گرائیاں مانہہ لوکاں غا کہراں مانہہ پہاری بارشاں نال پانی داخل ہو گيو ہے۔ منانو گراں غا بسنیک جھیڑا حالیہ سیلاب نال متاثر ہوا ہیں، شام لال تے سو ریشٹا دیوی نے آکاشوانی نیوز نال گل کرتاں واں اس طرح کہیو۔۔ بائٹ۔۔

Poonch Rains

ضلع پونچھ غا بکھ بکھ حصار مانہہ اج پہاری بارش ہوئی ہے۔ جس نال کٹھاں تے دریاں مانہہ پانی غی سطح مانہہ تیزی نال بابدو ہو ئو ہے۔ سُکا کٹھا محلہ مانہہ صورتحال تشویش ناک ہو گئی، جد پانی نے کئی رہائشیاں نانہہ اپنا گھر خالی کرن تے محفوظ جگہاں ور منتقل ہون ور مجبور کر دتو۔ مقامی لوکاں نے دسیو ہے جے پانی نچلا علاقہاں مانہہ داخل ہو گيو جس نال املاک غا نقصان تے حفاظت غے متعلق خدشات پیدا ہو گیا ہیں۔

Athletes

جموں کشمیر غا 2 کھلاڑیاں نے 18 تیں 25 اگست تک بنکاک تھائی لینڈ مانہہ منعقد ہ 57 ویں ایشین باڈی بلڈنگ اینڈ فزیک اسپورٹس چمپئن شپ 2025 مانہہ مُلک غو ناں روشن کیو ہے۔ وکاس کھجوریا نے مرداں گا اسپورٹس فزیک زمرہ مانہہ طلائی تمغو حاصل کیو ہے جد کہ ویمل جیت نے 60 کلو گرام وزن تیں کہٹ زمرہ مانہہ چاندی غو تمغو جتیو ہے۔ ان کھلاڑیاں غی شاندار کارکردگی نے جموں کشمیر مانہہ کھیڈاں غی بے پناہ صلاحیتاں نانہہ اُجاگر کیو ہے تے بین القوامی سطح ور مُلک غی عزت بدھائی ہے۔ اس دوران نائب وزیر اعلیٰ سُریندر چودھری نے دوہاں کھلاڑیاں نانہہ مبارکباد پیش کی ہے۔